


Sr. Ronnie van Trigt di ATIA despues di reunion cu formador Eman

"Fondo di AOV y edad di pensioen ta puntonan crucial cu mester di atencion"



ORANJESTAD(AAN): Un delegacion di ATIA a papia cu formador Eman y su team siman pasa pa discuti hunto riba puntonan crucial cu ta importante pa pais Aruba. Na su salida di e reunion sr. Ronnie van Trigt a bisa di ta satisfecho con e reunion a bay. E ambiente tabata bon y constructivo. Formador Eman a notifica ATIA di e tarea cu gobernador a dun'e den formacion di un gobierno nobo. Formador a papia tambe di e puntonan mas importante cu a wordo trece dilanti te awor den combersacion cu otro partnernan.

"ATIA a tuma nota di e puntonan aki. Na mes momento nos a haci un presentacion chikito di kico ATIA ta haciendo y unda nos enfoke ta. Tambe a papia riba e puntonan di ATIA cu e proximo gobierno mester tene cuenta cu nan".

Pa ATIA e fondo di AOV y edad di pensioen ta puntonan cardinal cu mester di atencion urgente. "Aumento di edad di pensioen y con introduci esaki ta topiconan cu masha lihe mester bin riba mesa, pasobra si no haci nada nan por afecta nos finanza publico", van Trigt a bisa. "Tambe nos a papia di implementacion di e structura con gobierno ta bay yega na e 'Balanced Budget Rule' y di e comision cu tin cu traha riba e ley aki. Con e roadmap pa yega na esaki ta hinca den otro". Van Trigt a bisa cu tur esaki ya caba a wordo discutido den Dialogo Social y ATIA ta mira cu gobierno su intencion ta pa implementa e ley aki manera mester ta.

Pa loke ta aumento di ley di pensioen van Trigt ta haya cu esaki ta un asunto cu mester wordo discuti. "No solamente dor di comerciantenan, pero tambe dor di representante nan di trahadornan. Hende ta biba mas largo y esaki ta nifica cu mas hende ta bay

cu pensioen. Nos tin algun opcion. Subi e edad di pensioen ta obviamente e prome opcion of si no hisa e prima. Si no hisa e edad mester hisa e prima. E prima ta wordo paga dor di e dunador di trabou, pero tambe dor di e trahador mes. Kier men cu si e trahador tin e oportunidad pa traha un poco mas largo, e ta un opcion factibel".

Pa ATIA Dialogo Social ta un asunto primordial cu mester keda. ATIA semper a para pa Dialogo Social. "Pa locual e ta representa, pero sigur tambe pa tur locual nos a logra caba hunto. Cu sindicato y gobierno nos a yega na acuerdonan cu tabata na beneficio di comunidad. Hopi tempo a wordo hinca den e Dialogonan, pero e resultadonan ta bon. Falta ainda pa traha riba cierto asuntonan importante". Van Trigt a bisa cu durante e reunion cu formador nan a comunica na ne di kier sigui riba e caminda aki. Participacion amplio den e plataforma Dialogo Social ta evidente pa sigui atende cu e puntonan cu tin biaha ta dificil pa solucionar, pero cu pa medio di dialogo ta yega hopi leu.

"Mi ta kere cu e sindicatonan ta bisa mescos y nos miembronan ta reconoce esaki. Dialogo Social tin biaha ta haya critica di esnan cu ta bisa cu e ta un cooperacion demasiado estrecho cu gobierno, pero tur hende mester por compronde cu gobierno tin otro alternativa. Gobierno por tuma decision riba su mes sin informa ningun otro hende. Pero gobierno a habri porta pa nos tur por trece nos punto y alternativanan dilanti. Finalmente e decision tuma ta un combinacion di tur e punto y alternativanan aki, prome e bay Parlamento pa wordo aproba y despues checuta".